



Le Prophete Zacharie est lapidé par le commandement du Roy Ioas, sur le paruis du Temple.

IOAS âgé de sept ans fust estably Roy par Iojada grand Prestre, & regna quarante ans en Ierusalem, lequel fist restaurer le Temple de Dieu. Auquel œuure Iojada tint la main, iusques à la perfection d'iceluy. Mais ce bon patron âgé de cent trente ans mourut. Et lors Ioas regnant sur Israël, fut induit par les Princes de Iuda à delaisser le Temple & le Dieu de ses peres, pour seruir aux boccages & aux Idoles : dont aduint indignation contre Iuda, & Ierusalem. C'est pourquoy Zacharie le Prophete remontra la faute & erreur du Roy d'Israël & du peuple, auquel il dist ; Pourquoy tranigressez-vous les commandemens du Seigneur ? Vous l'auiez delaissé, il vous delaissera, & fut Zacharie lapidé par le commandement du Roy Ioas, sur le paruis du Temple, n'ayant souuenance des bien-faits que Iojada pere d'Iceluy leur auoit fait. Et Zacharie mourant, dist ; Le Seigneur voye ce fait & le requiere. Mais auant qu'un an fut passé, l'armée des Syriens monta en Ierusalem, & occit tous les Princes du peuple ; & butina tous leurs biens, laissant le Roy Ioas en grand langueur, que ses seruiteurs tuerent en son lit, en vengeance du sang de Zacharie.